

---

## **PROPOSICIÓN DO GRUPO MUNICIPAL DE COMPOSTELA ABERTA PARA QUE A FUTURA SEDE DO IMELGA SE CONSTRÚA CONTANDO CON CONSENSO VECIÑAL E NUNHA ZONA NON RESIDENCIAL DE SANTIAGO**

O Grupo Municipal de Compostela Aberta, ao abeiro do regulamento orgánico municipal do Concello de Santiago, presenta a seguinte proposición para o seu debate no Pleno. O obxecto do acordo procura que a construción dun novo equipamento dotacional para cidade, como é a nova sede do Imelga, se realice con consenso veciñal.

### **EXPOSICIÓN DE MOTIVOS:**

O Instituto de Medicina Legal de Galicia (Imelga) é un órgano da Administración de Xustiza en Galicia que tén por misión prestarlles asistencia técnica aos tribunais, fiscalías e xulgados en materia de medicina forense. Integrado polo persoal médico forense, así como por persoal técnico e auxiliar, tén como obxectivo a investigación medicolegal en todos os casos de morte violenta ou sospeitosa de criminalidade. Tamén é importante a súa intervención no control periódico da evolución dos lesionados e a valoración dos danos corporais que sexan obxecto de actuacións procesuais, así como a asistencia e vixilancia facultativa das persoas detidas.

Ademais, as súas funcións comprenden o estudo e a emisión dos informes que lle sexan requiridos polas autoridades xudiciais e fiscais en todos os aspectos medicolegais. Tamén se encarga de emitir informes previstos na normativa sobre o Rexistro Civil sobre a idade ou sobre o sexo das persoas implicadas en expedientes gubernativos, sobre a causa da morte, etc.

Desde a posta en funcionamento do Imelga, no 2006, existe a previsión de construír un edificio para albergar a súa sede central. Inicialmente a previsión urbanística de Santiago contemplaba a súa localización na parcela na que finalmente se construíron os novos xulgados no barrio das Fontiñas. En 2008 contempláronse novas localizacións, ou máis próximas aos hospitais, ou mesmo no Polígono do Tambre, sendo ambas opcións desbotadas ao manter a dirección do Imelga o seu interese en que o edificio estivera situado o máis próximo posible aos Xulgados no barrio das Fontiñas.

Chegados ao ano 2020, tanto Concello como Xunta de Galicia manifestaron publicamente o acordo de cesión dunha parcela municipal e posterior construción da sede do Imelga na parcela DOC16 situada xusto nas traseiras do Centro Sociocultural de Fontiñas e que desde o ano 2013 tense incorporado, de facto, á zona verde que constitúe o Parque Begoña Caamaño. Finalmente, o edificio

non se construíra nesa parcela, grazas á mobilización da veciñanza de Fontiñas e ao acordo plenario do pasado 25 de marzo, a partir dunha proposición de CA na que se esixía a denegación do permiso para localizar a nova sede do Imelga neses terreos así como o inicio do procedemento de revisión urbanística para consolidar como zona verde todo o conxunto do Parque Begoña Caamaño.

A partir de aí, a nova localización para o Imelga comunicada polo goberno municipal sería unha parcela situada igualmente no barrio de Fontiñas, a AS-19. Unha vez máis, non houbo unha mínima interlocución nin diálogo coa veciñanza afectada das Fontiñas, particularmente no ámbito do Vieiro e as rúas Londres e Riga, e en xeral, con todo o barrio.

Alén da falta de diálogo cabe destacar tamén o enorme escurantismo co que o goberno de Santiago está a levar este tema, e do que son vítimas tanto a cidadanía como os propios grupos municipais con representación no Concello de Santiago. Porque se para albergar unha sede meramente administrativa do Imelga, que substituiría ás actuais dependencias situadas nas propias instalacións dos Xulgados poderían valer algunhas das parcelas dispoñibles nas Fontiñas, non sería este o caso cando se fala dunha sede que vai albergar tamén instalacións forenses e mortuorias que actualmente se encontran dispersas por varias localizacións da xeografía galega.

Neste sentido, e de acordo coa propia información difundida pola Xunta de Galicia, é certo que o edificio contará con espazo para oficinas e arquivos, mais tamén para o acceso dos furgóns mortuorios ou cámaras frigoríficas mortuorias, entre outras dependencias. A maiores, disporá de varias salas de autopsias que requiren alto nivel de bioseguridade BSEL3 para garantir a protección do persoal do Imelga na realización de autopsias de vítimas de enfermidades de transmisión respiratoria. Polo tanto, trátase dun edificio cuxas características están relacionadas coa perigosidade e risco de contaxio ou contaminación, debido á exposición de axentes transmisibles por aerosois que poden causar enfermidades de transmisión respiratoria como a Covid-19. É por iso que as salas estarán dotadas dun equipamento e mobiliario específico e incluírán características técnicas especiais relacionadas coa ventilación e a descontaminación como presión negativa ou filtros de aire de alta eficacia (HEPA).

Habilitar unha sede ou edificio específico para o Imelga, contando con todas as medidas e características que sexan precisas, ten que ser considerado como un feito positivo. As e os profesionais da medicina legal necesitan poder desenvolver o seu traballo con todas as garantías e nunhas instalacións modernas e ben dotadas. Mais este feito ten que ser compatible coa comodidade destas profesionais co seu traballo e a articulación da convivencia co resto da cidadanía.

Agora que xa existe moita máis información das necesidades e características desta nova sede, dende o grupo de CA consideramos que son moitos os motivos que desaconsellan ubicalo nunha zona residencial. Entre outras motivacións destacan os condicionantes de alta seguridade que precisa este edificio -e que en ningún momento foron transparentadas polo goberno municipal- no que se localizarían salas de autopsias que acollerían potenciais riscos biolóxicos, nunha localización que aumentaría o tránsito rodado nunha concorrida zona dun barrio tan poboado como o das Fontiñas e por último, mas non menos importante que estaría ubicado a escasos metros dunha escola infantil, dun colexio, dun instituto de secundaria, dunha ludoteca, dun pabellón deportivo municipal e de amplas zonas de lecer e esparcemento.

Por todo o anterior, e tendo en conta que esta nova decisión volveu adoptarse sen diálogo algún coa veciñanza e obviando o necesario consenso que debe prevalecer entre o Concello e a veciñanza do barrio, o Grupo Municipal de Compostela Aberta presenta á consideración do Pleno o seguinte **ACORDO:**

Instar ao correspondente órgano de goberno local a:

1. **Atender as reivindicacións da veciñanza de Fontiñas que reclama diálogo e unha nova localización para a nova sede do Imelga.**
2. **Escoller unha parcela municipal, para construír a nova sede do Imelga, que estea localizada nalgún ámbito urbano afastado das zonas residenciais e que sexa adecuada, tendo en conta os condicionantes técnicos e de seguridade, para que non se poña en perigo o benestar da veciñanza de Compostela.**

Santiago de Compostela, 6 de abril de 2021

Marta Lois González

Concelleira do Grupo Municipal de Compostela Aberta



**Á ATENCIÓN DO ALCALDE DE SANTIAGO DE COMPOSTELA**